



昔予嘗購求王荆公唐百家詩選二  
寸卷僅得殘帙八卷於江南藏書家庚辰秋舉  
人子丘邇求邇求好學嗜古請依舊式重梓  
廣其傳予甚誼之因序其首略云夫物莫不聚  
於所好而天地之氣有開必先故好龍而龍降  
市駿而駿來天下之大安知更無嗜古如邇求  
者或別購其半則幾乎全矣及梓成果大行於  
時寶愛之者比于吉光片羽莫不思復得河東  
三篋以覩其全焉先是吳中毛黼季氏喜刊古  
本而家中藏書最多予因屬其勤求是選黼季



敬諾而去旁搜遠索無日以怠今癸未秋黼季來謁予曰日者宸游江陰親見王荆公唐百家詩選二十卷於某氏藏書家特來告公予驚喜趣購得之凡所亡十二卷皆在焉總數之得百有四家而曰百家者舉成數也有乾道己丑盤谷倪仲傳後序夫荆公沒至孝宗乾道時不過六七十年間而序已云唐百家詩選淪沒於世蓋由北轅南渡播遷喪亂中其所亡失書籍固不止此也亦可慨夫况乾道至今又六百年而予寤寐之求甚久一朝忽得殆如香山居士所

云在在處處有靈物護之者乎於是復招邇求補刊十二卷俾成完書公諸同好此固陳農之所不能求而張安世之所不及識者也天下賞心樂事無踰於此昔雷煥得豐城雙劍以爲靈異之物終當化去留一自佩送一與張華華報書曰詳觀劍文乃干將也莫邪何復不至雖然天生神物終當合耳其後果化延津之雙龍噫物莫不聚於所好凡好之而不篤篤而不久久而怠倦以忘者吾未見其能聚也非邇求嗜古先梓其半以爲之招而黼季又爲予勤求歷久



而不倦其能終合乎哉是故精誠之至可以貫金石而通神明凡事盡然此其一徵也康熙癸未中秋西陂宋犖識

音有妙而難賞曲有高而寡和古今通然無惑乎唐百家詩選之淪沒於世也予自弱冠肄業於香溪先生門嘗得是詩於先生家藏之秘竊愛其拔唐詩之尤清古典麗正而不冶凡以詩鳴於唐有驚人語者悉羅於選中於是心惟口誦幾欲裂去夏課而學焉先生知之一日索而鑰諸笥越至於今不復過目者有年矣頃有親戚游宦南昌因得之於臨川以歸首以出示發卷數過不啻如獲遺珠之喜惜其道遠難致且字畫漫滅近世士大夫嗜此詩者往往不能無



恨故鏤板以新其傳庶幾丞相荆國公銓擇之意有所授於後人也雅德君子儻於三冬餘暇玩索唐世作者用心則發而為篇章殆見游刃餘地運斤成風矣乾道己丑四月望日蘭皋盤谷倪仲傳書

王荆公唐百家詩選序

余與宋次道同為三司判官時次道出其家藏唐詩百餘編諉余擇其精者次道因名曰百家詩選廢日力於此良可悔也雖然欲知唐詩者觀此足矣



王荆公唐百家詩選目錄

第一卷

明皇二首

德宗一首

薛稷一首

劉希夷九首

王適一首

韋述一首

盧象十首

孟浩然三十三首

第二卷

高適上六十首

第三卷

高適下十二首

岑參上五十首





第四卷

岑參下三十一首 儲光義二十一首

崔國輔二首 崔顥七首

陶翰一首 常建三首

第五卷

王昌齡二十三首 李頎二十四首

戎昱十六首

第六卷

沈千運四首 王季友二首

于逖二首 孟雲卿五首

張彪四首 趙微明五首

元季川四首 殷遙二首

李嘉祐十二首 姚係二首

雍裕之二首 蔣渙一首

陳羽五首 楊衡七首

第七卷

戴叔倫四十七首 郎士元二十一首

第八卷

錢起六首 盧綸三十六首

司空曙二十四首



第九卷

耿漳六首

李端九首

于武陵八首

熊孺登一首

張繼三首

包佶四首

包何一首

鮑防二首

張登二首

皇甫冉上二十首

第十卷

皇甫冉下六十五首

第十一卷

劉商九首

羊士諤十六首

長孫佐輔十三首

李約三首

竇常二首

竇牟一首

竇羣一首

竇庠一首

竇鞏八首

第十二卷

楊巨源四十六首

王建上二十四首

第十三卷

王建下六十八首

第十四卷

武元衡四首

令狐楚四首



劉言史十七首

張碧三首

李涉三十七首

第十五卷

盧仝十四首

于鵠三首

朱慶餘一首

張祜十二首

曹唐二首

賈島二十三首

趙嘏六首

第十六卷

許渾三十二首

項斯十二首

李頻十九首

第十七卷

李遠五首

雍陶二十五首

章碣四首

施肩吾一首

陳陶六首

李羣玉七首

章孝標一首

馬戴三首

劉得仁二首

高蟾三首

崔塗八首

第十八卷

李郢十八首

薛逢三首

鄭畋一首

薛能二十八首

秦韜玉四首

羅鄴五首

皮日休六首

第十九卷

劉滄四首

劉威一首

曹鄴一首

曹松十四首

張喬二首

劉駕一首

崔魯十二首

張蠙六首

方干二首

王駕四首

杜荀鶴四首

第二十卷

吳融二十七首

韓渥五十九首

王荆公唐百家詩選目錄終



王荆公唐百家詩選卷第一



明皇二首

德宗一首

薛稷一首

劉希夷九首

王適一首

韋述一首

盧象十首

孟浩然三十三首

明皇二首

早渡蒲關

鍾鼓嚴更曙山河野望通鳴鑿下蒲坂飛旆入  
秦中地險關逾壯天平鎮尚雄春來津樹合月  
落戍樓空馬色分朝景雞聲逐曉風所希常道

秦非復俟繻同

經魯祭孔子而歎之

夫子何爲者栖栖一代中地猶鄒氏邑宅即魯  
王宮歎鳳嗟身否傷麟怨道窮今看兩楹奠當  
與夢時同

德宗一首

送徐州張建封還鎮

牧守寄所重才賢生爲時宣風自淮甸授鉞膺  
藩維入覲展遐戀臨軒慰來思忠誠在方寸感  
激陳情詞報國爾所向恤人予是資歡宴不盡  
千里遙而云無已知

薛稷一首

秋日還京陝西十里作

驅車越陝郊北顧臨大河隔河見鄉邑秋風水  
增波西登咸陽途日暮憂思多傳巖旣紆鬱首  
山亦嗟峨操築無昔老採薇有遺歌客遊旣回  
換人生知幾何

劉希夷九首

希夷字庭芝武后時

故園置酒



酒熟人須飲春還鬢已秋願逢千日醉得緩百  
年憂舊里多青草新知盡白頭風前燈易滅川  
上月難留卒卒周姬旦棲棲魯孔丘平生能幾  
日不及且遨遊

晚憩南陽旅館

旅館何年廢征夫此日過途窮人自哭春至鳥  
還歌行路新知少荒田古路多池篁覆丹谷墳  
樹遶清波日照蓬陰轉風微野氣和傷心不可  
去回首怨如何

採桑

楊柳送行人青青西入秦誰家採桑女樓上不  
勝春盈盈灞水曲步步春芳綠紅臉曜明珠絳  
唇含白玉回首渭橋東遙憐樹色同釵梳映落  
日緗綺弄春風攜籠長歎息逶迤戀春色看花  
若有情倚樹疑無力薄暮思悠悠使君南陌頭  
相逢不相識歸去夢青樓

代閨人春日

珠簾的曉光玉顏豔春彩林間鳥鳴喚戶外花  
相待花鳥惜芳菲鳥鳴花亂飛人今伴花鳥日  
暮不能歸池月憐歌扇山雲愛舞衣佳期楊柳



陌攜手莫相違

秋日題汝陽潭壁

獨坐秋陰至悲來從所適行見汝陽潭飛蘿蒙  
水石懸瓢木葉上風吹何歷歷幽人不耐煩振  
衣步閑寂回流清見底金沙覆銀礫洛水非一  
丈空隴幾千尺魚鱗可憐紫鴨毛自然碧秋水  
弄清光渺焉忘損益遊山隨形影清濁混心跡  
歲暮歸去來東山余宿昔

代悲白頭翁

洛陽城東桃李花飛來飛去落誰家洛陽女兒

惜顏色行逢落花長歎息今年花落顏色改明  
年花開復誰在已見松柏摧為薪更聞桑田變  
成海古人無復洛城東今人還對落花風年年  
歲歲花相似歲歲年年人不同寄言全盛紅顏  
子須憐半死白頭翁此翁白頭真可憐伊昔紅  
顏美少年公子王孫芳樹下清歌妙舞落花前  
光祿池臺間錦繡將軍樓閣盡神仙一朝臥病  
無人識三春行樂在誰邊宛轉蛾眉能幾時須  
更鶴髮亂如絲但看舊來歌舞地唯有黃昏鳥  
雀悲



巫山懷古

巫山幽陰地神女豔陽年襄王伺容色落日望  
悠然歸來高堂夜金缸燄青煙顏想臥瑤席夢  
魂何翩翩搖落殊未已榮華倏徂遷愁思瀟湘  
浦悲涼雲夢田猿啼秋風夜雁飛明月天巴歌  
不可聽聽此益潺湲

春女行

春女顏如玉怨歌陽春曲巫山春樹紅沅湘春  
艸綠自憐妖豔姿糝成獨見時愁心伴楊柳春  
盡亂如絲目極千餘里悠悠春江水顏想玉關

人愁臥金閨裏尚言春花落不知秋風起嬌愛  
猶未終悲涼從此始憶昔楚王宮玉樓妝粉紅  
纖腰弄明月長袖舞春風容華委西山光陰不  
可還桑林沒東海富貴今何在寄言桃李容胡  
爲閨閣重但看楚王墓唯見數株松

孤松篇

蠶月桑葉青鶯時柳花白澹豔煙雨滋敷芬陽  
春陌如何秋風起零落從此始獨有南澗松不  
歎東流水玄陰天地冥皓雪朝夜零豈不懼寒  
暑爲君留青青青青好顏色落落任孤直羣樹



遙相望衆艸不敢逼靈龜卜真隱仙鳥宜棲息  
恥受秦帝封願言唐侯食寒山夜月明山冷氣  
清清淒兮歸風集吹之作琴聲松子臥仙岑寂  
聽凝野心清冷有真曲樵採無知音美人何時  
來幽逕委綠苔吁嗟深澗底棄捐廣厦材

王適一首

詠江濱梅

忽見寒梅樹開花漢水濱不知春色早疑是弄  
珠人

韋述一首

晚度伊水

悠悠涉伊水伊水清見石是時春向深兩岸草  
如積迢遞望洲嶼逶迤亘津陌新樹落疎紅遙  
原上深碧回瞻洛陽苑遽有長山隔煙霧猶辨  
家風塵已爲客登涉多異趨往來見行役雲起  
早已昏鳥飛日將夕光陰逝不借超然慕疇昔  
遠遊亦何爲歸來存竹帛

盧象十首

開元天寶時人

雜詩二首

家居五原上征戰是平生獨負山西勇誰當塞



上名死生遼海戰雨雪薊門行諸將封侯盡論  
功獨不成

君家御溝上垂柳夾朱門列鼎會中貴鳴珂朝  
至尊死生在片議窮達獨一言須識苦寒士莫  
矜狐白溫

八月十五日象自江東止田園移莊慶  
會未幾歸汶上小弟幼妹尤悲其別兼

賦是詩

謝病始告歸依然入桑梓家人皆佇立相候衡  
門裏疇類皆長年成人舊童子上堂家慶畢願

與親姻邇論舊或餘悲思存且相喜田園轉蕪  
沒但有寒泉水衰柳日蕭條秋光清邑里入門  
乍如客休騎非便止中飲顧王程離憂從此始  
兩妹日成長雙鬢將及人已能持寶瑟自解掩  
羅巾念昔別時小未知疎與親今來識離恨掩  
淚方殷勤小弟更孩幼歸來不相識同居雖漸  
慣見人猶默默宛作越人言殊鄉甘水食別此  
最為難淚盡有餘憶

寄江上段十六

與君相識即相親聞道君家住孟津為見行舟



試借問客中時有洛陽人

贈劉藍田

籬中犬迎吠出屋候柴扉歲晏輸井稅山村人  
暮歸晚田始家食餘布成我衣對此能無事勞  
君問是非

白髮

我年一何長鬢髮日已白俛仰天地間能為幾  
時客惆悵故山雲徘徊空日夕何事與時人東  
城復南陌

鄉賦後自鞏還田家鄰友見過之作

雞鳴出東邑馬倦登南巒落日見桑柘翳然丘  
中寒鄰家多舊識投暝來相看且問春稅苦兼  
陳行路難園場邊陰壑草木皆凋殘峰暗雪猶  
積澗深冰已團浮名知何用歲晏不成歡置酒  
共君飲當歌聊自寬

竹里館

江南冰不閉山澤氣潛通臘月聞山鳥寒崖見  
蟄熊柳林青半合荻筍亂無叢回首金陵岸依  
依向北風

和徐侍郎叢篠詠



中禁夕沈沈幽篁別作林色連雞樹近影落鳳  
池深為重凌霜節能虛應物心年年承雨露長  
對紫庭陰

宴別趙都護

結客候旌麾元戎復在斯門開都護府兵動羽  
林兒黠虜多翻覆謀臣有別離智同天所授恩  
共日相隨漢使開賓幕胡笳送酒卮風霜迎馮  
首雨雪事魚麗在策應無戰深情屬載馳不應  
行萬里明主寄安危

孟浩然三十三首

字浩然襄陽人開元天寶間以  
詩聞於時不仕卒年五十二

湘中旅泊寄閩九司戶防

桂水通百越扁舟期曉發荆雲蔽三巴夕望不  
見家襄王夢行雨才子謫長沙長沙饒瘴癘胡  
為苦留滯久別思欸顏承歡懷接袂接袂杳無  
由徒增旅泊愁清猿不可聽浴月下湘流

歲暮歸南山

北闕休上書南山歸弊廬不才明主棄多病故  
人疎白髮催年老青陽逼歲除永懷愁不寐松  
月夜窗虛

陪張丞相自松滋江入舟東泊渚宮作



放溜下松滋登舟命楫師詎忘經濟日不憚  
寒時洗幘豈獨古濯纓良在茲政成人自理  
機息鳥無疑雲氣霾孤嶼江天辨四維晚來風稍  
急冬至日行遲獵響驚雲夢漁歌激楚詞渚宮  
何處是川暝欲安坻

歲暮海上作

仲尼既已歿予亦浮於海昏見斗柄回始知星  
歲改虛舟任所適垂釣非有待借問乘查人滄  
洲復誰在

自洛之越

遑遑三十載書劍兩無成山水尋吳越風塵馱  
洛京扁舟汎湖海長揖謝公卿且樂杯中酒誰  
論世上名

王山人迴見尋

歸閑日無事雲臥晝不起有客歛柴扉白云巢  
居子問君何所之採藥來城市家在鹿門山常  
遊澗湖水手持白羽扇脚踏青芒履聞道鶴書  
徵臨流還洗耳

遊精思觀迴王山人在後

出谷未亭午至家已夕曛回瞻下山路但見牛



羊羣樵子暗相失草蟲寒不聞衡門猶未掩佇  
立待夫君

夜泊宣城界

西塞沿江島南陵問驛樓湖平津濟闊風止客  
帆收去去懷前浦茫茫汎夕流石逢羅刹礙山  
泊敬亭幽火熾梅根冶煙迷楊葉洲離家復水  
宿相伴賴沙鷗

永嘉上浦館逢張八子容

逆旅相逢處江村日暮時衆山遙對酒孤嶼共  
題詩廨宇鄰鮫室人煙接島夷鄉關萬餘里失

路一相悲

宿葉師山房期丁鳳進士不至

夕陽度西嶺羣壑倏已暝松月生夜涼風泉滿  
清聽樵人歸欲盡煙鳥棲初定之子期宿來攜  
琴候蘿徑

夕次蔡陽館

日暮馬行疾荒城人住稀聽歌知近楚投館忽  
如歸魯堰田疇廣章陵氣色微明朝拜家慶須  
著老萊衣

過故人莊



故人具雞黍邀我至田家綠樹村邊合青山郭  
外斜開筵面場圃把酒話桑麻待到重陽日還  
來就菊花

登鹿門山懷古

清曉因興來乘流越江峴沙禽近初識浦樹遙  
莫辨漸到鹿門山山明翠微淺崑潭多屈曲舟  
楫屢回轉昔聞龐德公采藥遂不返金澗養芝  
朮石床臥苔蘚紛吾感者舊結覽事攀踐隱迹  
今尚存高風邈已遠白雲何時去丹桂空偃蹇  
探討竟未窮回艫夕陽晚

裴司空功負司士見尋

府寮能枉駕家醞復新開落日池上酌清風松  
下來厨人具雞黍稚子摘楊梅誰道山公醉猶  
能騎馬回

送杜晃進士之東吳

荆吳相接水爲鄉君去春江正淼茫日暮征帆  
泊何處天涯一望斷人腸

登江中孤嶼貽王山人迥

悠悠清江水水落沙嶼出回潭石下深綠篠岸  
傍密鮫人潛不見漁父歌自逸憶與君別時泛



舟如昨日夕陽開返照中坐興非一南望鹿門  
山歸來恨相失

晚泊潯陽望廬峰作

挂席幾千里名山都未逢泊舟潯陽郭始見香  
爐峰常讀遠公傳永懷塵外蹤東林精舍在日  
暮空聞鍾

同張明府清鏡歎

妾有盤龍鏡清光常晝發自從生塵埃有若霧  
中月愁來試取照坐歎生白髮寄語邊塞人如  
何久離別

宿中山翠微寺空上人房

翠微終南裏雨後宜返照閉關久沉冥杖策一  
遊眺遂造幽人室始知靜者妙儒道雖異門雲  
林頗同調兩心喜相得畢景共談笑暝還高窗  
眠時見遠山燒緬懷赤城標更憶臨海嶠風泉  
有清音何必蘇門嘯

送友人之京

君登青雲去予望青山歸雲山從此別淚濕薜  
蘿衣

京還留別新豐諸官



吾道情所適驅車還向東主人開舊館留客醉  
新豐樹繞溫泉綠塵昏晚日紅拂衣從此去高  
步躡華嵩

江上別流人

以我越鄉客逢君謫居者分飛黃鶴樓流落蒼  
梧野驛騎尋雲去孤帆沿溜下不知從此分還  
袂何時把

上巳日洛中寄王山人迥

卜洛成周地浮盃上巳筵鬪雞寒石下走馬射  
堂前垂柳金堤合平沙翠幕連不知王逸少何

處會羣賢

秋登萬山寄張五儻

北山白雲裏隱者自怡悅相望試登高心隨鳥  
飛滅愁因薄暮起興是清秋發時見歸村人沙  
平渡頭歇天邊樹若薺江畔洲如月何當載酒  
來共醉重陽節

夜歸鹿門寺歌

山寺鳴鍾晝已昏漁梁渡頭爭渡喧人隨沙路  
向江村子亦乘舟歸鹿門鹿門月照開煙樹忽  
到龐公樓隱處嵒扉松徑長寂寥唯有幽人夜



來去

與諸子登峴山作

人事有代謝往來成古今江山留勝跡我輩復  
登臨水落漁梁淺天寒夢澤深羊公碑尚在讀  
罷淚沾襟

赴京途中遇雪

迢遞秦京道蒼茫歲暮天窮陰連晦朔積雪滿  
山川落雁迷沙渚飢鳥噪野田客愁空佇立不  
見有人煙

宿建德江

移舟泊滄渚日暮客愁新野曠天低樹江清月  
近人

萬山潭作

垂釣坐磐石水清心自閑魚游潭樹下猿挂島  
藤間神女昔解珮傳聞於此山求之不可得沿  
月權歌還

春中喜王九相尋

二月湖水清家家春鳥鳴林花掃更落徑草蹋  
還生酒伴來相命開尊共解醒當盃已入手歌  
妓莫停聲



途中遇晴

已失巴陵雨猶逢蜀坂泥天開斜景遍山出晚  
雲低餘濕仍霑草殘流尚入溪今宵有明月鄉  
思遠悽悽

送從弟邕落第東遊會稽

疾風吹征帆倏爾向空沒千里去俄頃三江坐  
超忽向來共歡娛日夕成楚越落羽更分飛誰  
能不驚骨

和張丞相春朝對雪

迎氣當春立承恩喜雪來潤從河漢下花逼豔

陽開不覩豐年瑞安知燮理才散鹽如可擬願  
糝和羹梅

王荊公唐百家詩選卷第一



王荊公唐百家詩選卷第二

高適上六十首

淇上酬薛三據兼寄郭主簿

自從別京華我心乃蕭索十年守章句萬事空  
寥落北上登薊門茫茫見沙漠倚劔對風塵慨  
然思衛霍拂衣去燕趙驅馬悵不樂天長滄州  
路日暮邯鄲郭酒肆或淹留魚潭屢棲泊獨行  
備艱險所見窮善惡永願拯菑蕘孰辭干鼎鑊  
皇情念淳古時俗何浮薄理道資任賢安人在  
求瘼故交負靈奇逸氣包蹇諤隱軫經濟具縱



橫建安作才望勿先鳴風期無宿諾飄飄勞州  
縣迢遞限言謔東馳渺貝丘西顧彌號洛淇水  
徒自流浮雲不堪託吾謀適可用天路豈遼廓  
不然買山田一身與耕鑿且欲同鷓鴣焉能志  
鴻鶴

途中酬李少府贈別之作

西上逢節換東征私自憐故人今臥疾欲別還  
留連舉酒臨南軒夕陽滿中筵寧知江上興乃  
在河梁偏行李多光輝扎翰忽相鮮誰謂歲月  
晚交情上貞堅終嗟州縣勞官謗復速遭雖負

忠信美其如方寸懸連帥扇清風千里猶眼前  
曾是趨藻鏡不應翻弃捐日來知自強風氣殊  
未痊可以加藥物胡為輒憂煎驅馬出大梁原  
野一悠然柳色感行客雲陰愁遠天皇明燭幽  
遐德澤普昭宣鵠鴻列霄漢鷲雀何翩翩余亦  
愜所從漁樵十二年種瓜漆園裏鑿井盧門邊  
去去勿重陳生涯難勉旃或期遇春事與爾復  
周旋投報空回首狂歌謝比肩

東平路中遇水

天災自古昔昏溺彌今秋霖霖溢川源傾洞涵



田疇指途適汶陽挂席經蘆洲永望齊魯郊白  
雲何悠悠旁沿鉅野澤大水縱橫流蟲蛇擁獨  
樹麋鹿奔行舟稼穡隨波瀾西成不可求室居  
相枕籍蛙黽聲啾啾仍憐穴蟻漂益羨雲禽遊  
農人無倚著野老生躬憂聖主多深仁廟堂運  
良籌倉廩終爾給田租應罷收我心胡鬱陶征  
旅亦悲愁縱橫濟時策誰肯論吾謀

留別洛下諸公兼贈鄭三韋九

憶昨相逢論久要顧君哂我輕常調羈旅雖同  
白社遊詩書比作青雲料蹇步蹉跎竟不成年

過四十尚躬耕長歌達者杯中物冷笑前人身  
後名幸逢明盛多招隱高山大澤徵求盡此時  
也得辭漁樵青袍裹身荷聖朝牛犁釣竿不復  
見縣人邑吏來相邀遠路鳴蟬秋興發華堂美  
酒離憂消不知何時更攜手應念茲辰去折翬

封丘作

我本漁樵孟諸野一生自是悠悠者乍可狂歌  
草澤中寧堪作吏風塵下祇言小邑無所爲公  
門百事皆有期拜迎官長心欲破鞭撻黎庶令  
人悲悲來向家問妻子舉家盡笑今如此生事



應須南畝田世情付與東流水夢想舊山安在  
哉為銜君命日遲迴乃知梅福徒為爾轉憶陶  
潛歸去來

贈別韋參軍

二十辭書劔西遊長安城舉頭望君門屈指取  
公卿國風冲融邁三五朝廷歡樂彌寰宇白璧  
皆言賜近臣布衣不得干明主歸來洛陽無負  
郭東過梁宋非吾土兔苑為農歲不登雁池垂  
釣心長苦世人向我同衆人唯君於我翻相親  
且嘉百年有交態未曾一日辭家貧彈棋擊筑

白日晚縱酒高歌楊柳春歡娛未盡分散去使  
我惆悵驚心神終當不作兒女別臨岐涕泗沾  
衣巾

九月九日酬顏少府

簷前白日應可惜籬下黃花為誰有行子迎霜  
未授衣主人得錢始沽酒蘇秦顛顛時多馱蔡  
澤恓惶世看醜縱使登高祇斷腸不如獨坐空  
搔首

送李少府貶峽中王少府貶長沙

嗟君此別意何如駐馬銜杯問謫居巫峽啼猿



數行淚衡陽歸雁幾封書青楓江上秋天遠白  
帝城邊古木疎聖代即今多雨露暫時分手莫  
躊躇

平臺夜遇李景參有別

離憂忽浩然策馬對秋天孟諸薄暮涼風起歸  
客相逢渡睢水昨時攜手已十年明日分途各  
千里歲物蕭條滿路岐此行浩蕩令人悲家貧  
羨爾有微祿欲往從之何所之

別晉處士

有人家住清河源渡河問我遊梁園手持道經  
注已畢心知內篇口不言盧門十年見秋艸此  
心惆悵誰能道知己從來不易知想君爲人與  
我好別時九月桑葉疎出門千里行無車愛君  
且欲君先達今日求賢早上書

送別

昨夜離心正鬱陶三更白露西風高螢飛木落  
何浙瀝此時夢見西歸客曉鍾寥亮三四聲東  
鄰嘶馬使人驚攬衣出戶一相送唯見歸雲縱  
復橫

燕歌行

并序



開元二十六年有從元戎出塞而還者作燕歌  
行以示適感征戍之事作燕歌行

漢家煙塵在東北漢將辭家破殘賊男兒本自  
重橫行天子非常賜顏色撻金伐鼓下榆關旌  
旆逶迤碣石間校尉羽書飛瀚海單于獵火照  
狼山山川蕭條極邊土胡騎憑陵雜風雨戰士  
軍前半死生美人帳下猶歌舞大漠窮秋草木  
腓孤城落日鬪兵稀身當恩遇常輕敵力盡關  
山未解圍鐵衣遠戍辛勤久玉筋應啼別離後  
少婦城南欲斷腸征人塞北空回首邊庭飄颻

那可度絕域蒼茫何所有殺氣三時作陣雲寒  
聲一夜傳刁斗相看白刃血紛紛死節從來豈  
顧勲君不見沙場征戰苦至今猶憶李將軍

古大梁行

古城蒼茫多荆榛驅馬荒城愁殺人魏王宮館  
盡禾黍信陵賓客隨灰塵憶昔雄都舊朝市軒  
車照曜歌鍾起軍容帶甲三十萬國步連營一  
千里全盛須臾那可論高臺曲池無復存遺墟  
但有狐狸窟古地空餘草木根暮天搖落傷懷  
抱倚劔悲歌對秋草俠客猶傳朱亥名行人尚



識夷門道白壁黃金萬戶侯寶刀駿馬填山丘  
年代淒涼不可問往來唯有水東流

行路難

君不見富家翁舊時貧賤誰比數一朝金多結  
豪貴萬事勝人健如虎子孫成長滿眼前妻能  
管絃妾歌舞自矜一身忽如此却笑旁人獨愁  
苦東鄰少年安所如席門窮巷出無車有才不  
肯學干謁何用年年空讀書

邯鄲少年行

邯鄲城南遊俠子自矜生長邯鄲裏千場縱博

家仍富幾處報讐身不死宅中歌笑日紛紛門  
外車馬長如雲未知肝胆向誰是令人却憶平  
原君君不見即今交態薄黃金用盡還疎索以  
茲感歎辭舊遊更於時事無所求且與少年飲  
美酒往來射獵西山頭

薊門行五首

邊城十一月雨雪亂霏霏元戎號令嚴人馬亦  
輕肥羌胡無盡日征戰幾時歸

幽州多騎射結髮重橫行一朝事將軍出入有  
聲名紛紛獵秋草相向角弓鳴



黯黯長城外日沒更煙塵胡騎雖憑陵漢兵不  
顧身古樹滿空塞黃雲愁殺人  
薊門逢故老獨立思氛氲一身既零丁頭髮白  
紛紛勲庸今已矣不識霍將軍  
漢家能用武開拓窮異域戍卒厭糟糠降胡重  
衣食關亭試一望吾欲淚沾臆

營州歌

營州少年馱原野皮裘蒙茸獵城下虜酒千杯  
不醉人胡兒十歲能騎馬

魯郡途中

誰謂嵩穎客遂經鄒魯鄉前臨少昊墟始覺東  
蒙長獨行豈吾心懷古激中腸聖人久已矣游  
夏遙相望徘徊野澤間左右多悲傷日出見闕  
里川平知汶陽弱冠負高節十年思自強終當  
不得意去去任行藏

酬鴻臚裴主簿雨後北樓見贈之作

暮霞照新晴歸雲猶相逐有懷晨昏暇想見登  
眺目問禮侍彤襜題詩訪茅屋高樓多古今陳  
事滿陵谷地久微子封臺餘孝王築徘徊顧霄  
漢豁達俯川陸遠水對秋城長天向喬木公門



何清靜列戟森已肅不歎攜手稀常思著鞭速  
終當拂羽翰輕舉隨鴻鵠

宋中遇林慮楊十七山人因而有別

昔予涉漳水驅車行鄴西遙見林慮山蒼蒼憂  
天倪邂逅逢爾曹說君彼嵒棲蘿徑垂野蔓石  
房倚雲梯秋韭一何青藥苗數百畦栗林隘谷  
口枯木森迴谿耕耘有山田紡績有山妻人生  
但如此寧事組與珪誰謂遠相訪曩情常不迷  
簷前舉醇醪舍下烹隻雞朔風忽振蕩昨夜寒  
蜚啼遊子益思歸罷琴傷解攜出門盡原野白  
壑歲暮一攀躋

送馮判官

日黯已低始驚道路難終恨言笑睽因聲謝岑  
碣石遼西地漁陽薊北天關山唯一道雨雪盡  
三邊才子方爲客將軍正愛賢遙知幕府下書  
記日翩翩

酬龐十兵曹

憶昔遊京華自言生羽翼懷書訪知己末路空  
相識許國不成名還家有慙色託身從畎畝浪  
迹初自得雨澤感天時耕耘忘帝力同人洛陽



至問我睢水北遂爾欵津涯淨然見曾臆高談  
懸物象逸韻投翰墨別岸迴無垠海鶴鳴不息  
梁城多古意攜手共悽惻懷賢想鄒枚登高思  
荆棘世情惡疵賤之子憐孤直酬贈感并深離  
憂豈終極

連上酬王秀才

飄飄經遠道客思滿窮秋浩蕩對長連君行殊  
未休崎嶇山海側想像無前儔誰謂照乘珠忽  
然欲暗投東路方蕭條楚歌復悲愁暮帆使人  
感去鳥兼離憂行矣當自愛壯心莫悠悠予亦

從此辭異鄉難久留言宴豈終極慎勿滯滄洲

東平留贈狄司馬

曾與田安  
西充判官

古人無宿諾茲道未為難萬里赴知己一言誠  
可歎馬蹄經月窟劔術指樓蘭地出北庭盡城  
臨西海寒森然瞻武庫則是弄儒翰入幕縮銀  
綬乘軺兼鐵冠練兵日精銳殺敵無遺殘獻捷  
見天子論功俘可汗激昂丹墀下顧盼青雲端  
誰謂縱橫策翻為權勢干將軍旣坎壈使者亦  
辛酸耿介挹三事羈離從一官知君不得意他  
日會鵬搏



錢宋八充彭中丞判官之嶺外

覩君濟時略使我氣填膺長策竟不用高才徒  
見稱一朝知己達累日詔書徵羽翮忽然動風  
颺誰敢陵舉鞭趨嶺障屈指冒炎蒸北雁送馳  
驛南人思飲冰彼邦本倔强習俗多驕矜翠羽  
干平法黃金撓直繩若將除害馬慎勿信蒼蠅  
魑魅寧無患忠貞適有憑猿啼山不斷鷲跼路  
難登海岸出交趾江城連始興繡衣當節制幕  
府盛威稜勿憚九疑險須令百越澄立談多感  
激行李即嚴凝離別胡為者雲霄遲爾昇

同群公題鄭少府田家

此公昔任白馬尉今寄住滑臺

鄭侯應栖遑五十頭盡白昔為南昌尉今作東  
郡客與語多遠心論交知損益秋林既清曠窮  
巷空淅瀝蝶舞園更閑雞鳴日云夕男兒未稱  
意其道固無適勸君且杜門勿嫌人事隔

同顏六少府旅居秋中之作

傳君昨夜悵然悲獨坐深齋落木時逸氣舊來  
陵燕雀高才何得混妍蚩迹勞黃綬人多歎心  
在青雲世莫知不是鬼神無正直從來州縣有  
瑕疵



酬裴秀才

男兒貴得意何必相知早飄蕩與物華蹉跎覺  
身老長卿無產業季子慙妻嫂此事難重陳未  
於衆人道

宋中送族姪式顏時張大夫貶括州使  
人召式顏遂有此作

大夫擊東胡胡塵不敢起胡人山下哭胡馬海  
邊死部曲盡封侯輿臺亦朱紫當時有勲績末  
路遭讒毀轉旆燕趙間剖符括蒼裏弟兄莫相  
見親族遠粉梓不改青雲心仍招布衣士平生

懷感激本欲候知己去矣難重陳飄飄自茲始  
遊梁且未愜適越今何以鄉山西北愁竹箭東  
南美崢嶸縉雲外蒼茫萬餘里猿鳥亂啾啾朝  
昏孰云已登臨多瘴癘動息在風水雖有賢主  
人終爲客行子我攜一尊酒滿酌聊勸爾與爾  
唯一言家聲勿淪滓

淇上送韋司倉往滑臺

飲酒莫辭醉醉多適不愁孰知非遠別終念對  
新秋滑臺門外見淇水眼前流君去應回首風  
波滿渡頭



別魏八

更沽淇上酒還汎驛前舟爲惜故人去復憐嘶  
馬愁雲山行處合風雨興中秋此路方知己明  
珠莫暗投

宋中三首

逍遙漆園吏冥沒不知年世事浮雲外閑居大  
道邊古來同一馬今我亦忘筌  
登高臨舊國懷策對窮秋落日鴻雁度寒城砧  
杵愁昔賢不復有行矣莫淹留  
關伯去已遠高丘臨道傍人皆有兄弟獨爾爲

參商終古猶如此而今安可量

自淇涉黃河

朝從北岸來泊船南河澣試共野人言深覺農  
夫苦去秋雖薄熟今夏猶未雨耕耘日劬勞租  
稅兼舄鹵園蔬空寥落薄產不足數尚有獻芹  
心無因見明主

和崔二少府登楚丘城作

故人亦不遇異縣久棲託辛勤失路意感歎登  
樓作清晨眺原野獨立窮寥廓雲散芒碭山水  
還睢陽郭遶梁即襟帶封衛多漂泊事古悲城



池年豐愛墟落相逢俱未展攜手空蕭索何意  
千里心仍求百金諾公侯皆我輩動用在謀略  
聖心思賢才竭來刈葵藿

同朱五題盧使君義井

高義惟良牧深仁自下車寧知鑿井處還是飲  
冰餘地即泉源久人當汲引初體清能鑿物色  
泊每含虛上善滋來往中和澹里閭濟時應未  
竭懷惠復何如

哭單父梁九少府

開篋淚沾臆見君前日書夜臺今寂寞猶是子  
雲居疇昔探靈竒登臨賦山水同舟南楚下望  
月西江裏契闊多別離綢繆到生死九原即何  
處萬事皆如昨晉山徒嗟峨斯人已寂寞常時  
祿且薄沒後家復貧妻子在遠道弟兄無一人  
十上多苦心一官恒自哂青雲將可致白日忽  
先盡唯有身後名空留無遠近

送柴司戶充劉卿判官之嶺外

嶺外資雄鎮朝端寵節旄月卿臨幕府星使出  
詞曹海對羊城闊山連象郡高風霜驅瘴癘忠  
信涉波濤別恨隨流水交情脫寶刀有才無不



適行矣莫徒勞

雜言賦得還山吟送沈山人

還山吟天高日暮寒山深送君還山識君心人  
生老大須恣意看君解作一生事山間偃仰無  
不至石泉淙淙若風雨松花桂子常滿地賣藥  
囊中應有錢還山服藥又長年白雲勸盡杯中  
物明月相隨何處眠眠時憶問醒時事夢魂可  
以長周旋

酬岑二十秋夜見贈之什

舍下蛩亂鳴居然自蕭索緬懷高秋興忽在清  
夜作感物我心勞涼風驚二毛池空菡萏死月  
出梧桐高如何異鄉縣復得交才彥汨沒嗟後  
時蹉跎恥相見箕山別來後魏闕誰不戀獨有  
江海心悠然未嘗倦

苦雪

二月猶北風天陰雪冥冥寥落一室中悵然慙  
百齡苦愁正如此門柳復青青

李雲南征蠻

并序

天寶十一載有詔伐西南夷丞相楊公兼節制  
之寄乃奏前雲南太守李宓涉海自交趾擊之



道路艱難往復數萬里蓋百王之所未通也十  
二載四月至於長安君子是以知廟堂使能而  
李公効節余忝斯人之舊因賦是詩

聖人赫斯怒詔伐西南戎肅穆廟堂上深沉節  
制雄遂令感激士得建非常功料死不料敵顧  
恩寧顧終鼓行天海外轉戰蠻夷中梯巘近高  
鳥穿林經毒蟲鬼門無歸客北戶多南風蜂蠆  
隔萬里風雲隨九攻長驅大浪破急擊羣山空  
餉道忽已遠縣軍垂欲窮精誠動白日憤薄連  
蒼穹野食掘田鼠晡餐兼爨僮收兵列亭候拓

地彌西東臨事恥苟免履危能飭躬將星獨照  
耀邊色何溟濛瀘水夜可涉交州今始通歸來  
長安道召見甘泉宮廉藺若未死孫吳知暗同  
相逢論意氣慷慨謝深衷

### 登百丈峰

朝登百丈峰遙望燕支道漢壘青冥冥胡天白  
如掃憶昔霍將軍連年此征討匈奴終不滅寒  
山徒草草惟見鴻雁飛令人傷懷抱

### 送渾將軍出塞

將軍族貴兵且強漢家已是渾邪王子孫相承



在朝野至今部曲燕支下控弦盡用陰山兒臨  
陣常騎大宛馬銀鞭玉勒繡螭弧每逐嫖姚破  
骨都李廣從來先將士衛青未肯學孫吳傳有  
沙場千萬騎昨日邊庭羽書至城頭畫角三四  
聲匣裏寶刀晝夜鳴意氣能甘萬里去辛勤動  
作一年行黃雲白草無前後朝建旌旗夕刁斗  
塞下應多俠少年關西不見春楊柳從軍借問  
所從誰擊劒酣歌當此時遠別無輕繞朝策平  
戎早賽仲宣詞

寄宿田家

田家老翁住東陂說道平生隱在茲鬢白未曾  
記日月山青每到識春時門前種柳深成巷野  
谷流泉添入池牛壯日耕十畝地人閑常掃一  
茅茨客來滿酌清罇酒感興平吟才子詩崑際  
窟中藏鼯鼠潭邊竹裏隱鷓鴣林稀落日行人  
少醉後無心怯路岐今夜只應還寄宿明朝拂  
曉與君辭

酬司空遂少府

飄飄未得意感激與誰論昨日偶夫子乃欣吾  
道存江山滿詞賦扎翰起涼溫吾見風雅作人



知德業尊驚颺蕩萬木秋氣屯高原燕趙何蒼  
茫鴻雁來翩翩此時與君別握手欲無言

同衛八題陸少府書齋

知君薄州縣好靜無冬春散帙至棲鳥明燈留  
故人深房臘酒熟高院梅花新若是周旋地當  
令風義親

同群公題張處士菜園

耕地桑柘間地肥菜常熟爲問葵藿資何如廟  
堂肉

同羣公出獵海上

畋獵自古昔况伊心賞俱偶與羣公遊曠然出  
平蕪曾陰漲溟海殺氣窮幽都鷹隼何翩翩馳  
驟相傳呼豺狼竄榛莽麋鹿懼艱虞高鳥下駢  
弓困獸鬪匹夫塵驚大澤晦火燎深林枯失之  
有餘恨獲者無全軀咄彼工拙間恨非指縱徒  
猶懷老氏訓感歎此歡娛

魯西至東平四首

南圖適不就東走豈吾心索索涼風動行行秋  
水深蟬鳴木葉落茲夕更愁霖

昨時好書策動欲干王公今日無成事依依親



老農扁舟向何處吾愛汶陽中  
清曠涼夜月飄飄孤客舟眇然風波上獨夢前  
山秋秋到復搖落空吟行者愁  
沙岸泊不定石橋水橫流問津見魯谷懷古傷  
家丘寥落千歲後空傳褒聖侯

別韋五

徒然酌杯酒不覺散人愁相識仍遠別欲歸翻  
旅遊夏雲滿郊甸明月照河洲莫恨征途遠東  
看漳水流

王荆公唐百家詩選卷第二

王荆公唐百家詩選卷第三

高適下十二首

岑參上五十首

高適下十二首

自淇涉黃河四首

川上恒極目世情今似閑去帆帶落日征路隨  
長山親友若雲霄可望不可攀於茲任所愜浩  
蕩風波間

亂流自茲始倚楫時一望遙見楚漢城崔嵬高  
山上天道昔未測人心無所向屠釣稱王侯龍  
蛇爭霸王緬懷多殺戮顧此增慘愴聖代休甲



兵吾其得閑放

野人盡白頭與我忽相訪手持青竹竿日暮淇  
水上雖老美容色雖貧若閑放約莫三十年中  
心無所向

朝景入平川川長復垂柳遙看魏公墓突兀前  
山後憶昔大業中羣雄各奔走伊人何電邁獨  
立風塵首傳檄舉教倉擁兵屯洛口連營一百  
萬六合如可有方項終比肩亂隋將假手力爭  
固難恃驕戰曷能久若使學蕭曹功名當不朽

宋中四首

梁王昔全盛賓客復多才悠悠一千年陳迹唯  
高臺寂寞向秋草悲風千里來  
出門望終古獨立悲且歌憶昔魯仲尼栖栖此  
經過衆人不可向伐樹將如何  
朝臨孟諸上忽見芒碭間赤帝終已矣白雲長  
不還時清更何有禾黍遍空山  
梁苑白日暮梁山秋草時君王不可見修竹令  
人悲九月桑葉盡寒風吹樹枝

宓公琴臺詩

并序

甲子歲適登子賤琴臺賦三首首章懷宓公之



德千祀不朽次章美太守李公能嗣子賤之政  
再造琴堂末章美邑宰崔公能繼子賤之理  
宓子昔為政鳴琴登此臺琴和人亦閑千祀稱  
其才臨眺忽悽愴人琴安在哉悠悠此天壤空  
有頌聲來

邦伯感遺事慨然建琴堂乃知靜者心千載猶  
相望入室想其人出門何茫茫唯見白雲合東  
臨鄒魯鄉

皤皤邑中老自言邑中理何必升君堂然後知  
君美開門無犬吠早臥常晏起昔人不忍欺今

我還復爾

贈別沈四山人

沈侯未可測其况信浮沉十載常獨坐幾人知  
此心乘舟蹈滄海買劍投黃金世務不足煩有  
田西山岑我來遇知己遂得開神襟何意閩閩  
間沛然江海深疾風卷秋樹濮上多鳴砧耿耿  
尊酒前聯雁飛愁陰平生重離別感激對孤琴

岑參上五十首

文本之曾孫天寶初登進士第  
由庫部郎中出嘉州刺史卒

巴南舟中夜書事

渡口欲黃昏歸人爭渡喧近鍾清野寺遠火點



江村見雁思鄉信聞猿積淚痕孤舟萬里夜秋  
月不堪論

青山峽口泊舟懷狄侍御

峽口秋水壯沙邊且停橈奔濤振石壁峰勢如  
動搖九月蘆花新彌令客心焦誰念在江島故  
人滿天朝無處豁心曾憂來醉能銷往來巴山  
道三見秋草凋狄生新相知才調陵雲霄賦詩  
坼造化入幕生風颺把筆判甲兵戰士不敢驕  
皆云梁公後遇鼎還能調一別倏經時音塵殊  
寂寥何當見夫子不歎鄉關遙

送王大昌齡赴江寧

對酒寂不語悵然愁送君明時未得用白首徒  
工文澤國從一官滄波幾千里群公滿天闕獨  
去過淮水舊家富春渚常憶臥江樓自聞君欲  
行頻夢南徐州窮巷獨閉門寒燈靜深屋北風  
吹微雪抱被肯同宿君行到京口正是桃花時  
舟中饒孤興湖上多新詩潛虬且深蟠黃鶴舉  
未晚惜君青雲器努力加餐飯

臨河縣客舍呈狄明府兄留題縣南樓  
鳳陽城南雪正飛黎陽渡頭人未歸河邊酒家



唐詩三  
堪寄宿主人小女能縫衣故人高臥黎陽縣一  
別三年不相見邑中雨雪偏著時隔河東郡人  
遙羨鄴都唯見古時丘漳水還如舊日流域上  
望鄉應不見朝來好是嬾登樓

送楊子

斗酒渭城邊壚頭耐醉眠梨花千樹雪楊葉萬  
條煙惜別添壺酒臨岐贈馬鞭看君潁上去新  
月到家圓

送蓋孺卿落第歸濟州

獻賦頭欲白還家衣已穿羞過灞陵樹歸種汶

陽田客舍少鄉信床頭無酒錢聖朝徒側席濟  
上獨遺賢

宿太白東溪李老舍寄弟姪

渭上秋雨過北風何騷騷天晴諸山出太白峰  
最高主人東溪老兩耳生長毫遠近知百歲子  
孫皆二毛中庭井欄上一架獼猴桃石泉飯香  
粳酒甕新開糟愛茲田中趣始悟世上勞我行  
有勝事書此寄爾曹

送張郎中赴隴右觀省卿公

時卿公充  
節度留後

中郎鳳一毛世上獨英豪弱冠已銀印出身唯



寶刀還家卿月迴度隴將星高幕下多相識邊  
書醉嬾操

登古鄴城

下馬登鄴城空城復何見東風吹野火日暮飛  
雲電城隅南對望陵臺漳水東流不復回武帝  
宮中人去盡年年春色爲誰來

送許子擢第歸江寧拜親因寄王大昌

齡

建業控京口金陵歛滄溟君家臨秦淮傍對石  
頭城十年自勤學一鼓遊上京青春登甲科動

地聞香名解榻皆五侯結交盡時英六月槐花  
飛忽思蓴菜羹跨馬出國門丹陽返柴荆楚雲  
引歸帆淮水浮客程到家拜親時入門有光榮  
鄉人盡來賀置酒相邀迎閑眺因登樓醉眠湖  
上亭月從海門出照見茅山青昔爲帝王州今  
幸天地平五朝變人世千載空江聲玄元告靈  
符丹洞獲其銘皇帝受玉冊羣臣羅天庭喜氣  
薄太陽祥光徹宵冥奔走朝萬國崩騰集百靈  
王兄尚謫宦屢見秋雲生孤城帶後湖心與湖  
水清一縣無諍辭有時開道經黃鶴垂兩翅徘



唐言三  
六  
徊悲且鳴相思不可見空望牛女星

武威送劉單判官赴安西行營便呈高

開府

熱海亘鐵門火山赫金方白草磨天涯胡沙莽  
茫茫夫子佐戎幕其鋒利如霜中歲學兵符不  
能守文章功業須及時立身有行藏男兒感忠  
義萬里忘越鄉孟夏邊候遲胡國草未長馬疾  
過飛鳥天窮超夕陽都護新出師五月發軍裝  
甲兵二百萬錯落金光揚揭旗拂崑崙伐鼓震  
蒲昌太白引官庫天威臨大荒西望雲似蛇戎

夷知喪亡渾驅大宛馬繫取樓蘭王曾到交河  
城風土斷人腸塞驛遠如點邊烽互相望赤亭  
多飄風鼓怒不可當有時無人行沙石亂飄颺  
夜靜天蕭條鬼哭夾道傍地上多髑髏皆是古  
戰場置酒高館夕邊城月蒼蒼軍中宰肥牛堂  
上羅羽觴紅淚金燭盤嬌歌豔新妝望君仰青  
冥短翮難可翔蒼然西郊道握手何慨慷

玉門關蓋將軍歌

蓋將軍真丈夫行年三十執金吾身長七尺頗  
有鬚玉門關城迴且孤黃沙萬里百草枯南鄰



犬戎北接胡將軍到來備不虞五千甲士膽力  
麤軍中無事但歡娛暖屋繡簾紅地爐織成壁  
衣花攏瑜燈前侍婢瀉玉壺金鐙亂點野駝酥  
紫紱金章左右趨問著即是蒼頭奴美人一雙  
閑且都朱脣翠睂映明眸清歌一曲世所無今  
日喜聞鳳將雛可憐絕勝秦羅敷使君五馬謾  
踟躕野草繡窠紫羅襦紅牙鏤馬對檇蒲玉盤  
纖手撥作盧衆中誇道不曾輸櫪上昂昂皆駿  
駒桃花叱撥價最殊騎將獵向城南隅臘日射  
殺千年狐我來塞外按邊儲爲君取醉酒剩酤

醉爭酒盞相喧呼却憶咸陽舊酒徒

天山雪送蕭沼歸京

天山有雪常不開千峰萬嶺雪崔嵬北風夜卷  
赤亭口一夜天山雪更厚能兼漢月照銀山復  
逐胡風過鐵關交河城邊飛鳥絕輪臺路上馬  
蹄滑晻澹寒氛萬里凝闌干陰崖千丈冰將軍  
狐裘臥不暖都護寶刀凍欲斷正是天山雪下  
時送君走馬歸京師客中何以贈君別唯有青  
青松樹枝

涼州館中與諸判官夜集



彎彎月出挂城頭城頭月出照涼州涼州七城  
十萬家胡人半解彈琵琶琵琶一曲腸堪斷風  
蕭蕭今夜漫漫河西幕中多故人故人別來三  
五春花門樓前見秋草豈能貧賤相看老一年  
大笑能幾回斗酒相逢須醉倒

初過隴山途中呈宇文判官

一驛過一驛驛騎如星流平明發咸陽暮及隴  
山頭隴水不可聽嗚咽令人愁沙塵撲馬汗霧  
露凝貂裘西來誰家子自道新封侯前月發安  
西路上無停留都護猶未到來時在西州十日

過砂磧終朝風不休馬走碎石中四蹄皆血流  
萬里奉王事一身無所求也知塞垣苦豈爲妻  
子謀山口月欲出先照關城樓谿流與松風靜  
夜相颼颼別家賴歸夢山塞多離憂與子且攜  
手不愁前路修

燉煌太守後庭歌

燉煌太守才且賢郡中無事高枕眠太守到來  
山出泉黃砂磧裏人種田燉煌耆老鬢皓然願  
留太守更五年城頭月出星滿天曲房置酒張  
錦筵美人紅妝色正鮮側垂高髻插金鈿醉坐



藏鉤紅燭前不知鉤在若箇邊爲君手把珊瑚  
鞭射得半段黃金錢此中樂事亦已偏

送祁樂歸河東

祁樂後來秀挺身出河東往年詣驪山獻賦温  
泉宮天子不召見揮鞭遂從戎前月還長安囊  
中金已空有時忽乘輿畫出江上峰牀頭蒼梧  
雲簾下天台松忽如高堂上颯颯生清風五月  
火雲屯氣燒天地紅鳥且不敢飛子行如轉蓬  
少華與首陽隔河勢爭雄新月河上出清光滿  
關中置酒灞亭別高歌披心胷君到故山時爲

謝吾老翁

送郭又

地上青草出經冬今始歸博陵無近信猶未換  
春衣憐汝不忍別送汝上酒樓初行莫早發且  
宿灞橋頭功名須及早歲月莫虛擲早年已攻  
詩近日兼注易何時過東洛早晚渡盟津朝歌  
城邊柳鞞地邯鄲道上花撲人去年四月初我  
正在河朔曾上君家縣北樓樓上分明見恒嶽  
中山明府待君來須計行程及早回到家速覓  
長安使待汝書封我自開



安西館中思長安

家在日出處朝來喜東風風從帝鄉來異鄉家  
信通絕域地欲盡孤城天遂窮彌年但走馬終  
日隨飄蓬寂寞不得意辛勤方在公胡塵淨古  
塞兵氣屯邊空鄉路眇天外歸期如夢中遙憑  
長房術爲縮天山東

送魏四落第還都

東歸不得意客舍戴勝鳴臘酒飲未盡春衫縫  
已成長安柳枝春欲來洛陽梨花在前開魏侯  
池館今尚在猶有太師歌舞臺君家盛德豈徒  
然時人注意在吾賢莫令別後無佳句祇向壚  
頭空醉眠

喜韓樽相過

三月灞陵春已老故人相逢耐醉倒甕頭春酒  
黃花脂祿米祇充酤酒資長安城中足年少獨  
共韓侯開口笑桃花點地紅班班有酒留君且  
莫還與君兄弟日攜手世上虛名好是閑

送張子尉南海

不擇南州尉高堂有老親縣樓重蜃氣邑里雜  
鮫人海暗三山雨江明五嶺春此鄉多寶玉慎



莫厭清貧

澧頭送蔣侯

君住澧水北我家澧水西兩鄉見喬木五里聞  
鳴雞飲酒溪雨過彈碁山月低徒開蔣生逕爾  
去誰相攜

澧水東店送唐子歸嵩陽

野店臨官路重城壓御堤山開灞水北雨過杜  
陵西歸夢秋能作音佐鄉書醉嬾題橋回忽不見  
征馬尚聞嘶

南樓送衛馮得歸字

近縣多來客似君誠亦希南樓取涼好便送故  
人歸鳥向望中滅雨侵晴處飛應須乘月去且  
爲解征衣

送宇文舍人出宰元城得陽字

雙鳧出未央千里過河陽馬帶新行色衣聞舊  
御香縣花迎墨綬關柳拂銅章別後能爲政相  
思淇水長

贈酒泉韓太守

太守有能政遙聞如古人俸錢盡供客家計常  
清貧酒泉西望玉關道千山萬磧皆白草辭君



走馬歸長安憶君倏忽令人老

餞李郎尉武康

潘郎腰綬新霽上縣花春山色低官舍湖光映  
吏人不須嫌邑小莫即恥家貧更作東征賦知  
君有老親

過酒泉憶杜陵別業

昨日宿祁連今朝過酒泉黃砂西際海白草北  
連天愁裏難銷日歸期尚隔年陽關萬里夢知  
處杜陵田

武威春暮聞宇文判官安西使還已到

晉昌

片雨過城頭黃鸝上戍樓塞花飄客淚邊柳挂  
鄉愁白髮悲明鏡青春換弊裘君從萬里使聞  
已到瓜州

宿鐵關西館

馬汗蹋成泥朝馳幾萬蹄雪中行地角火處宿  
天倪塞迴心常怯鄉遙夢亦迷那知故園月也  
到鐵關西

題首菴峰寄家人

首菴峰邊逢立春胡蘆河上淚沾巾閨中只是



空相憶不見沙場愁殺人

玉關寄長安李主簿

去去長安萬里餘故人何惜一行書  
玉關西望腸堪斷况復明朝是歲除

逢入京使

故園東望路漫漫雙袖龍鍾淚不乾  
馬上相逢無紙筆憑君傳語報平安

暮秋山行

疲馬臥長坂夕陽下通津  
山風吹空林颯颯如有人  
蒼旻霽涼雨石路無飛塵  
千念集暮節萬

籟悲蕭辰鷓鴣昨夜鳴  
蕙草色已陳况在遠行  
客自然多苦辛

函谷關歌送劉評事使關西

君不見函谷關崩城毀壁至今在  
樹根草蔓遮古道空谷千年長  
不改寂寞無人空舊山  
聖朝無外不須關白馬公孫何處去  
青牛老人更不還  
蒼苔白骨空滿地月與古時長  
相似野花不省見行人  
山鳥何曾識關吏  
故人方乘使者車  
吾知郭丹却不如  
請君時懷關外客  
行到關西多寄書



衛尚書赤驃馬歌

君家赤驃畫不得一團旋風桃花色紅纓紫鞵  
珊瑚鞭玉鞍錦韉黃金勒請君鞞出看君騎尾  
長窳地如紅絲自矜諸馬皆不及却憶百金新  
買時香街紫陌鳳城內行人見者誰不愛揚鞭  
驟急白汗流弄影行驕碧蹄碎紫髯胡雛金翦  
刀平明翦出三駿高櫪上看時獨意氣衆中牽  
出偏雄豪騎將獵向南山口城南狐兔不復有  
草頭一點疾如飛却使蒼鷹翻向後憶昨看君  
朝未央鳴珂擁蓋滿路香始知邊將真富貴可

憐人馬相輝光男兒稱意得如此駿馬長鳴北  
風起待君東去掃胡塵爲君一日行千里

郡齋閑望

負郭無良田屈身狗微祿平生好疎曠何事就  
羈束幸曾趨丹墀數載侍黃屋故人盡榮寵誰  
念此幽獨州縣非宿心雲山忻滿目頃來廢章  
句終日披案牘佐郡竟何成自悲徒祿祿

潼關使院懷王七秀才

王生今才人時輩咸所仰何當見顏色終日勞  
夢想驅車到關下欲往阻河廣滿目徒春華思



君罷心賞開門見太華朝日映高掌忽覺蓮花  
峰別來更如長無心顧微祿有意佳獨往不負  
林中期終當出塵網

宿華陰郭東客舍憶閩防

次舍山郭近解鞍鳴鍾時主人炊新粒行子充  
夜飢關月生首陽照見華陰祠蒼茫秋山晦蕭  
瑟寒松悲久從園廬別遂與朋知辭舊壑蘭杜  
晚歸軒今已遲

田使君美人如蓮花北錠歌

此曲本出  
北同城

如蓮花舞北錠世人有眼應未見高堂滿地紅

攴毬試舞一曲天下無此曲胡人傳入漢諸客  
見之驚且歎慢臉嬌蛾纖復穠輕羅金縷花蔥  
籠迴裾轉袖若飛雪左錠右錠生旋風琵琶橫  
笛和未市花開山頭黃雲合忽作出塞入塞聲  
白草明沙寒颯颯翻身入破如有神前見後見  
回回新始知諸曲不可比採蓮落梅徒聒耳世  
人學舞只是舞姿態豈能得如此

衙郡守還

世事何反覆一身難可料頭白翻折腰還家私  
自笑所嗟無產業妻子嫌不調五斗米留人東



溪憶垂釣

陪使君早春東郊游眺

得春字

太守擁朱輪東郊物候新  
鶯聲隨坐嘯柳色喚行春  
谷口雲迎馬溪邊水照人  
郡中叨佐理何幸接芳塵

題虢州西樓

錯料一生事蹉跎今白頭  
縱橫皆失計妻子也堪羞  
明主雖能棄丹心亦未休  
愁來無去處只上郡西樓

虢州後亭送李判官使赴晉絳

得秋字

西原驛路挂城頭客散江亭雨未休  
君去試看汾水上白雲猶似漢時秋

和賈舍人早朝大明宮

雞鳴紫陌曙光寒鶯囀皇州春色闌  
金闕曉鐘開萬戶玉階仙仗擁千官  
花迎劔珮星初落柳拂旌旗露未乾  
獨有鳳皇池上客陽春一曲和皆難

行軍詩二首

時扈從在鳳翔

吾竊悲此生四十幸未老一朝逢世亂終日不自保  
胡兵奪長安宮殿生野草傷心五陵樹不



見二京道我皇在行軍兵馬日浩浩胡雛尚未  
滅諸將懇征討昨聞咸陽敗殺戮淨如掃積屍  
若丘山流血漲灑瀉干戈礙鄉國豺虎滿城堡  
村落皆無人蕭條空桑棗儒生有長策無處豁  
懷抱塊然傷時人舉首哭蒼昊

早知逢世亂少小謾讀書悔不學彎弓向東射  
狂胡偶從諫官列謬向丹墀趨未能匡吾君虛  
作一丈夫撫劍傷世路哀歌泣良圖功業今已  
遲攬鏡悲白鬚平生抱忠義不敢私微軀

送許拾遺歸江寧

詔書下青瑣駟馬還吳洲東帛仍賜衣恩波漲  
滄流微祿將及親向家非遠遊看君五斗米不  
謝萬戶侯適出西掖垣如到南徐州歸心望海  
日鄉夢登江樓大江盤金陵諸山橫石頭楓樹  
隱茅屋橘林繫歸舟種藥疏故畦釣魚垂舊鉤  
對月京口夕觀濤海門秋天子憐諫官論事不  
可休早來丹墀下高駕無淹留

北庭北樓呈幕中諸公

嘗讀西域傳漢家得輪臺古塞千年空陰山獨  
崔嵬二庭近西海六月秋風來日暮上北樓殺



唐詩三  
六  
氣凝不開大荒無鳥飛但見白龍堆舊國眇天  
末歸心日悠哉上將新破胡西郊絕煙埃邊城  
寂無事撫劔空徘徊幸得趨幕中託身廁羣才  
早知安邊計未盡平生懷

王荆公唐百家詩選卷第三



